




ՔՐԻՍՏՈՍ ՅԱՐԵԱՒ Ի ՄԵՌԵԼՈՅ.
ՕՐՀԵԱՆ Է ՅԱՐՈՒԹԻՒՆՆ ՔՐԻՍՏՈՍ

ՀԱՅԲԱՊԵՏԱԿԱՆ
ԿՈՆԳՐԱԿՆԵՐ

ՕՐՀՆՈՒԹԵԱՆ
ԳՐԵՐ



Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ՊԱՏԳԱՍԸ ՄԵՐ ՏԵՐ ՀԻՍՈՒՄ ՔՐԻՍՏՈՍԻ ՅՐԱՇԱՓԱՌ ՀԱՐՈՒԹՅԱՆ ՏՈՆԻ ԱՌԻՈՒՎ

(Երեւան, Սուրբ Գրիգոր Լուսավորիչ եկեղեցի, 31 մարտի, 2024 թ.)

Յանուն Հօր եւ Որդւոյ եւ Հոգւոյն Սրբոյ. ամէն:

«Ձսուրբ եւ զհրաշալի եւ զյաղթող զյարու-
թիւնդ Քո օրհնեմք եւ փառատրեմք»

(Ժամագիրք):

Սիրելի՛ բարեպաշտ հավատացյալներ,

Մեր Տեր Հիսուս Քրիստոսի Հրաշափառ Հարուսթյան ավետիսն է հնչում այսօր մեր եկեղեցիների սուրբ խորաններից: Աքանջելախորհուրդ ավետիսը հույսով ու հոգենորոգ զգացումներով է պարուրում հայրենիքի ու ազգային կյանքի ցավերով ու կորուստներով դառնացած մեր սրտե-
րը: Կյանքը հաղթանակել է, մահը՝ պարտվել ու խորտակվել: Հավատքով ու առ Աստված ապավինութեամբ միասնաբար օրհնաբանենք Տիրոջը ժամասացի խոսքերով. «Սուրբ եւ հրաշալի եւ հաղթող Քո Հարուսթունը օրհնում ենք եւ փառավորում»:

Քրիստոս Իր Հարուսթեամբ մարդկութեանը ազատել է չարի իշխանու-
թյունից, ցույց տվել ներման եւ սիրո ճանապարհը, հաշտութիւն հաս-
տատել մարդու եւ Աստծու միջեւ եւ ընծայել հավիտենական կյանքի հույսն ու շնորհը: Աստվածորդու ողորմածութեամբ կյանքի արշալույսն է տարածվել մահվան խավարի վրա: Կենարար խաչը, որի վրա հեղվեց Տիրոջ Սուրբ Արյունը, մահվան հանգեպ հաղթութեան նշան է դարձել, Հարուսթյան հավատը՝ չարին պարտութեան մատնելու երկնապարգեւ ուժ:

Այո՛, սիրելիներ, հաղթող է, սուրբ եւ հրաշալի Քրիստոսի Հարու-
սթունը: Աշխարհի հարափոփոխ իրադարձութիւնների եւ հատկապէս

բարդ ու դժվարին իրավիճակների մեջ Հարուստյան շնորհներով հավատացյալները զորանում են՝ վեր հանելու փորձություններից, մերժելու կորստաբեր երեւոյթներն ու կործանարար մտածումներն ու գործերը, հաղթահարելու աղետաբեր պատերազմների արհավիրքները, նորոգվելու Տիրոջով, ինչպես որ Սուրբ Գիրքն է վկայում. «Եթե մեկը Քրիստոսի մեջ է, նա նոր արարած է» (Բ. Կորնթ. Ե. 17):

Համայն մարդկությանն այսօր էլ հնչում է հրավերը առաջնորդվելու աստվածադիր պատվիրաններով, մահվան հանդիման կերտելու կյանքի հաղթանակը, անվեհեր պաշտպանը լինելու ճշմարտության ու արդարության եւ առանց Աստծու մեռյալ գոյությունը փոխարինելու Տիրոջ հետ հարուցյալ կյանքի: Այս կոչին ականջալուր, «վասն հավատո, վասն հայրենյաց» սրբազան ուխտով միաբանված՝ պատմության հոլովույթներում դիմակայել ենք բազում դժվարությունների ու փորձությունների: Հարուստյան հավատի վկայությունը նաեւ մեր օրերում հռչակումն է մեր ժողովրդի դավանանքի եւ ազգային սրբազան արժեքներին հավատարմության, որոնք դարեր շարունակ երաշխիքն են եղել հայոց ազգի ինքնության ու լինելության, դպրության ու գիտության զարգացման: Հարկ է այս արժեքներով սերունդներ կրթել եւ անաղարտ ու անկորուստ պահպանել մարդկության գիտամշակութային գանձարանը հարստացրած մեր նախնյաց ավանդներն ու ժառանգությունը:

Սիրելի՛ բարեպաշտ զավակներ ի Հայաստան եւ ի սփյուռք, Տիրոջ Սուրբ եւ Հրաշափառ Հարությունը գոտեպնդող խրախույս է ամենքիս հույսով ու արիությանմբ դիմագրավելու մեր երկրի առջեւ ծառացած մարտահրավերները՝ հատկապես հետպատերազմյան այս ծանր շրջանում, երբ բռնազավթված ու հայաթափված է Արցախը, եւ չեն դադարում Ադրբեջանի ծավալապաշտական ու սադրիչ գործողությունները նորանոր պահանջներով, որոնք անմիջական սպառնալիքներ են ստեղծում մեր պետության անվտանգությանը: Հանցագործ դրսեւորումներով շարունակվում են Արցախի պատանդառված քաղաքական ղեկավարության եւ անօրինաբար գերության մեջ պահվող մեր զավակների նվաստացումները, ինչպես եւ արցախահայության իրավունքների անտեսման, Արցախում հայկական հոգեւոր-մշակութային ժառանգության յուրացման ու ոչնչացման անթաքույց քաղաքականությունը: Դատապարտելի այս իրողությունների հանդիման մեր ժողովրդի սեպուհ պարտքն է հաղթահարել ներազգային տարածայնություններն ու անմիաբանությունը, լծվել ծանր



կորուստներ կրած մեր ազգի վերքերի ամոքմանը եւ կարողությունների մեկտեղմամբ հայրենիքի հզորացմանը: Հարուցյալ կյանքը, հիրավի, սկսվում է քրիստոսավանդ պատգամներով ապրելու վճռականությամբ, արհավիրքներից ու տառապանքներից դեպի կենսանորոգ ձեռքբերումներ առաջին քայլից: Այս գիտակցությունը, այս ոգին պիտի աննկուն պահենք մեզանում, չընկրկենք մեզ պատուհասած փորձությունների դիմաց, չգործենք պարտվողական հոգեբանությամբ եւ չվերածվենք վհատված ու տկար ազգի՝ վտանգելով մեր հայրենիքի ապագան եւ անկախ պետականությունը: Մեր ընթացքը չի վերջանում մեր մարտիրոսների ու քաջորդիների նահատակության վայրերում եւ ոչ էլ Արցախում թողնված շիրիմների մոտ: Չարի կողմից մեզ համար փորված գերեզմանը բոլոր ժամանակներում թափուր է մնալու, քանզի մենք Քրիստոսի հետ նեղությունները հաղթահարող եւ ամեն գողգոթայից հարուստ հավատքով հառնող ժողովուրդ ենք: Արդարեւ, մեր ապագայի վերաբերյալ վճիռը խավարինն ու մահվանը չէ, այլ կյանքինն ու հարուստին: Աստծո հետ հզոր հավատքով, անընկճելի կամքով ու ոգով վերհառնել կարող է ոչ միայն անհատը, այլեւ ազգն ու պետությունը: Մեր ժողովրդի համար ներկա բարդ պայմաններում կենսական եւ հրամայական է մեր երկրի հզորացումը, կենսական է ապրել ու գործել անսակարկ հայրենասիրությամբ ու ազգանվիրումով: Այս հաստատակամ ընթացքով կարող պիտի լինենք կերտելու նոր հորիզոնները մեր պատմության եւ վերազարթոնքը պետական, ազգային-եկեղեցական մեր արժանապատիվ կյանքի: Այսպես իրականություն պիտի լինի առաքյալի բացականչությունը նաեւ մեր ժողովրդի համար. «Ո՛ր է, մա՛հ, քո հաղթությունը, ո՛ր է, գերեզման, քո խայթոցը» (Ա. Կորնթ. ԺԵ. 55): Արդ, վառ պահենք մեր սրտերում առ հարուցյալ Քրիստոս մեր հավատը, հույսն ու սերը, գալիքի բարի ակնկալությունը: Աստված մեզ կոչում է հարուստ, ուստի թոթափենք մեզանից երկյուղն ու հուսահատությունը, հեռացնենք մեզանից ատելությունն ու թշնամանքը, պիղատոսյան ու հուդայական գործելակերպը, մեր աչքերը հառենք հարուցյալ Փրկչին եւ ընթանանք միմիայն հարուստ հաղթական ճանապարհով:

Այս մաղթանքով եւ Սուրբ Հարության ավետիսով ողջունում ենք մեր Սուրբ Եկեղեցու Նվիրապետական Աթոռների գահակալներին՝ Ն. Ս. Օ. Տ. Տ. Արամ Ա. Մեծի Տանն Կիլիկիո Կաթողիկոսին, Երուսաղեմի Հայոց Պատրիարք Ամենապատիվ Տ. Նուրհան արքեպիսկոպոս Մանու-

կյանին, Կոստանդնուպոլսի Հայոց Պատրիարք Ամենապատիվ Տ. Սահակ արքեպիսկոպոս Մաշալյանին, քույր Եկեղեցիների հոգեւոր Պետերին՝ հայցելով Ամենակալ Աստծու զորակցութիւնը իրենց առաքելության արդյունավորման մեջ: Հայրապետական Մեր սերն ու օրհնութիւնն ենք հղում մեր Սուրբ Եկեղեցու ողջ հոգեւոր դասին եւ հավատավոր համայն Մեր ժողովրդին ի հայրենիս եւ ի սփյուռս:

Սիրելիներ, Սուրբ եւ Հրաշափառ Հարության տոնի այս լուսառատ օրը մեր սրտերից աղոթք բարձրացնենք առ ամենակալն Աստված, որ աշխարհին պարգեւի խաղաղութիւն ու բարօրութիւն, իր ամենախնամ Սուրբ Աջի հովանին տարածյալ պահի մեր հայրենիքի վրա եւ օրհնի ու երկնահեղ շնորհներով պայծառացնի ազգս հայոց՝ ապրելու ապահով ու անվտանգ կյանքով եւ փառավորելու Ամենասուրբ Երրորդությանը այժմ եւ միշտ եւ հավիտյանս, ամեն:

Քրիստոս յարեալ ի մեռելոց,

Օրհնեալ է Յարութիւնը Քրիստոսի:

